

## IRINTOCCH DA LA SPERANZA

Ul vintidüü da maarz milanöfcent  
nuvantadüü, la Gesa paruchiaal  
da Mundrumpin l'è tüta in muvimeent  
par una növa entrada pasturaal.

'L sarà che i sentimeent e la resun  
diventan malinconich cun l'età,  
ma mì stu vulertera in d'un cantun,  
un puu a vedè, e un puu a medità

sura 'sta cerimonia, e sül pasaa.  
sü quel che tütt 'sti geent a Mundrumpin  
in sécui d'esistenza ànn afruntaa  
sia visìn che luntàn dal campanin.

Se un Preet al surna, un àltar l'à sapaa...  
e i Cristian vann e végnan di par di  
'mè vann e végnan mérit e pecaa.  
dumà la Cruus la resta sémpar lì.

E intanta che sguisisi la Madona  
guardài cun fa' da mamm, e San Zenun  
guardài cun fa' da pà, föra rintrona  
'na prucesiun da machin sül stradun.

Stradun che l'è pegiuur d'un divisor  
tra 'l rabatàss mudernu e i tradiziun.  
da una paart, i vöj püsee ilüsori,  
e da l'altra, muraal e religiun.

Cusè 'l vöör di 'stu cuur innanz e indree,  
'stu deent e föra a tö la perdunanza?  
Vess un Cristian-dó facc: vün quand ta see  
in crisi, e l'àltar, quand che ta na vanza?

Ta paar che dumà ben al sia nà in Gesa,  
ninà la feed cumè la füss un sogn  
e mai cercà da perdunà un'ufesa  
né mai vütà chi cría in dal bisogn?

Furtüna che a salvàmm, anca sperveers,  
ul Padreternu l'à mandaa i so Preet  
vurendu che ognadün al füss diveers,  
par cunfruntà la pesca cunt i reet.

Incöö, insema a Quij che gh'è staa chi,  
sa vedarà rivà tütt i por Moort,  
par tegnì pizz la feed ai nóstar di  
e dacch al Prevost nööf ul sò cunfoort.

Podum ciamài, pregài a vün a vün.  
par tanti bun aziun che luur ànn faa,  
al salvatacc pó pü scapàcch nisün,  
parchè l'è 'l ben che vaar infin sül maa.

Sura a un viaal, in dal cöör da Mundrumpin,  
Gh'è un Preet che parla anmò da fratelanza,  
che quand al scüsia i tast dal campanin  
al fà sentì i rintocch da la speranza.